



缅怀赞颂

录履春亭记

岭之呼公公也自明天顺六年葬我何氏三世祖考始其祭於清明也自天顺后始其废而复举也自国朝雍正十年始其亭而祭之也自乾隆三十六年始先是祭於山麓或值泼火雨来草草成礼高祖兰芳府君惧貽神恫命大父竹园赠君输金构亭埜无褻祭者数十年无何嘉庆中圯於风雨其址寻拓为阡陌矣越今不复式礼多愆非所以似续也癸亥秋杪铭润请於族长族长颺之且以昔亭上理宅后向偏茔右择买兹地敦促兴工明年先清明三日亭成砖属炎薪若干柱属斧木若干取自祖茔四旁一切经费计缗钱五万有奇则铭润出赀任之时主其事者族长也董其功者房首也谓亭宜记并宜名因取雨露春濡履深怵惕之义额以履春后之子孙继继绳绳尚其思所以时厥祭而毋忽哉

明经公勋孙附贡生国子监典籍銜铭润敬撰

录明经会同公祠堂记

祖宗明德远矣萃数十世后子姓於此展明裡敦伦序祠堂之建可缓乎哉我教授公明洪武中由江淮徙居邵之严塘遂为严塘何氏始祖族姓繁盛为堂祠之矣四传至明经会同公我房开派祖也颺衍椒蕃星罗碁布岁时令节祭无定所草率将事而已道光甲申春十五世孙次坤等倡议於旃檀林侧创建斯祠鳩工庀材两阅寒暑而始蒧事乃諏吉安主为文以祀先是甫建议时旃檀僧潮音打包夜归瞥见是地火光烂然疑有异掘之寂如而祠前两山并峙怪石嵯峨谚所称大砦小砦也其小砦亦数於四五更时火光出巔照耀

星汉或曰火文明象是祠落成以来厥后克昌方兴未艾斯兆应之矣余谓冥福为子孙所不敢妄希而龔成主立神得所凭事未有大於此者每当岁时致祭既裸而后饮福受胙黄发垂髻相与酬酢一堂联欢忻敦揖让斯乃我祖在天之灵欣然默鉴者后之人惟是永相雍睦不时修葺承承继继世奉豆笾先人馀庆所貽庶永享勿替云

明经公嗣孙咸丰辛亥
恩科解元国子监学正銜前善化县教谕陞用
清军府濬年 敬撰
光绪十五年己丑十一月上澣 公鐫

岭秀亭记

自公公岭迤而西有小村俗呼为麕角冲峰峦复叠望之蔚然而深秀者我四世祖考明经公之墓在焉公系前明正统贡元后之人履阡思敬至今称为秀才祖山先是岁时拜扫因墓莹斗峻遥望而祭辄草率成礼僉谓隆然一坏宜祭以亭遂度地经营庀材輦石肇修於光绪己卯秋逾月亭成归然与履春亭竝峙旁筑小屋数椽守墓人居之每岁清明届期洒扫陈俎豆备牲醴祭拜如仪昭诚悫也而祖妣谢太孺人同境异山相距匪遥尤冀精灵不昧祭日同享其诚追报本亭以是不朽颜曰岭秀取其与公公岭一脉相连为毓秀所自始世世子孙当顾名思义岁加修葺无负先人庇荫庶人文蔚起正未有艾也

光绪十五年己丑十一月下澣